

## REGIONAL NEWS

HEADLINES:-

1. Adviser to Chief Minister (Political) Pu Lalmuanpuia Punte in Manipur buaina chungchanga inbiakna atan Chief Minister Pu Lalduhoma'n biak tur pawl bik a sawi lo a ti.
2. Thla 7 kalta chhung khan Mizoram Police leh Excise and Narcotics department hnathawkten heroin kg. 89 leh gram 317 bakah methamphetamine kg. 335 leh gram 605 an man.
3. Ruahsur nasa vanga tunhnaia chhiatna thlenna, Kerala leh Himachal Pradesh-ah chhanchhuah beihpui thlak chhunzawm zel a ni.
4. Israel leh Lebanon hel pawl, Hezbollah inkar boruak sang chho zel avangin United States leh United Kingdom-ten Lebanon chhuahsan vat turin an ram mite an ngen.

&lt;&gt;&lt;&gt;&lt;&gt;

CM AS MEDIATOR

Adviser to Chief Minister (Political) Pu Lalmuanpuia Punte chuan Manipur buaina chingfel tura inbiakna atan Chief Minister Pu Lalduhoma'n biak tur pawl bik a sawi lo a ti.

Lamka a Mizo Village Volunteer-te din cham lawmna a Churachandpur-a kal Pu Lalmuanpuia Punte chuan Chief Minister Pu Lalduhoma leh Union Home Minister Amit Shah te inbiakna chanchin a lo hriat thu leh Manipur Chief Minister N. Biren Singh-a'n Manipur buaina chingfel tura palai hna thawk tura Pu Lalduhoma a sawm thu pawh a lo hriat thu a sawi a. Hemi thu a hriat hian Pu Lalduhoma chu be nghalin Manipur a pawl thenkhatte tel ve se a duh thu leh pawl pakhat hming a sawi ni a chanchin thehdarh awm chu chutianga hming hmerha sawi a neih loh thu a sawi tih Pu Lalduhoma hian a hrilh niin a sawi a. Mizorama a lokir hunah Pu Lalduhoma nen hian kimchang zawka an inbiak tur thu leh Chief Minister hian hun remchang hmasa berah Manipur a kal a tum thu leh tawiawm tura a duh thu a sawi niin a tarlang bawk a ni.

Ningani khan Pu Lalduhoma hian Delhi-a a chenna inah Amit Shah hi a kawm a. Manipur a buaina chingfel thuai a duh thu leh Manipur Chief Minister-in zin tura a sawm thu a hrilh a. Hemi chungchangah hian Amit Shah chuan Biren Singh-a sawmna anga a tul chuan palai hna thawh pawh tha a tih thu a hrilh niin sorkar thuchhuahin a tarlang a ni.

&lt;&gt;&lt;&gt;&lt;&gt;

ASSEMBLY

Mizoram Assembly Fur thutkhawm, tun thla August ni 20 a tan tur chu ni 2 chauh awh tura ruahman a ni.

Assembly Fur thutkhawm hi tun thla ni 20 a tan turin larsap Pu Hari Babu Kambhampati chuan a kova. Assembly inkhawm hun hman dan tur rela Speaker Pu Lalbiakzama hova Ningani kalta legislature party hrang hrang aiawh telna Business Advisory Committee (BAC) thukhawm chuan ni hnih chhung thutkhawm ni se tih an rel a ni. Assembly Secretariat atanga thu dawn danin sorkar lam atanga dan siam tur pakhat chauh a la luh avang leh luh belh tur a awm em tih hriat theih mai a nih loh avangin August ni 20 a thutkhawm tan hi a tuk ni 21-a tihtawp tura rel a ni a. Ngaihtuah tur dang a awm belh chuan inkhawm hi pawhsei theih a nih thu official-te chuan an sawi a ni.

Tuna assembly dinglai hi Mizoram state a nih hnu a assembly 9-na a ni a assembly inkhawm lo awm tur hi a vawi 3-na tur a nih thu official-te chuan an sawi bawk.

&lt;&gt;&lt;&gt;&lt;&gt;

MZP

Govt. Champhai College-a Economics & Political Science zirtirtu indaih lohna avanga sawrkar nawrna tura hma an lak mek chu chhunzawm zel an tum.

Hemi chungchangah hian nizan khan MZP Hqrs. Champhai Executive Emergency Committee chu an President Lalruatdika te chenna Inah an thukhawm a, thuchhuah siam nghalin, August ni 2-ah Mizo Zirlai Pawl Headquarters Champhai chuan lungawi lohna lantir in College zirtirtu leh zirlaite class kal tur dan a nih hnu ah August ni 3-ah Sawrkar nen an inbia a. Sawrkar lam harsatna leh an tum dante hrilh hriat an nih hnu-ah tun maiah chuan zirtirtu pek theih a nih loh thu hrilh an ni a. College-in zirtirtu an mamawh tawh

dante ngaihtuah a nih hnu-ah Executive Committee in ngun takin a ngaihtuah a zirtirtu hnawhkhah chu thil theih ni a a hriat avangin Sawrkar ngenna zahawm a tih rualin thu an lo chhuah tawh angin lungawi lohna lantir chhonzawm na'n naktuk thawhtanni atanga Zirna In zawng zawng leh Sawrkar Pisa kai tur dan a tum chu a kaltlangpui dawn tih ansawi a, Pisa an dan tur zingah hian Bank leh Hospital O.P.D te chu a huam lo ang. MZP Hqrs.chuan naktuk-a pisa leh Zirna In a kai tur dangtu tur, Duty te pawh an ruahman nghal a ni.

Mizoram Sawrkar aiawhte, Champhai North bialtu MLA leh Champhai DEO leh SDEO te pawhin zirna tibahlah zawnga chet la lo turin MZP Hqrs. hruaitute chu an ngen bakah August thla chhungin College zirtirtu siamrem (Rationalization) tum a nih thu sawiin chumi chu lo nghak hram turin an ngen a, amaherawh chu, Inrinni a Executive Emergency Committee chuan ruahmanna an lo siam tawh ang a kaltlang zel ni se an ti a ni.

<><><>

#### DRUGS SEIZURE

Kumin January leh July thla inkar (thla 7) chhung khan Mizoram Police leh Excise and Narcotics department hnathawkte chuan heroin kg. 89 leh gram 317 bakah methamphetamine kg. 335 leh gram 605 an man.

Police leh Excise and Narcotics department hotute hnen atanga thu dawn danin Police hian heroin kg. 57 leh gram 126 an man bakah methamphetamine kg. 223 leh gram 77 an man a. Hemi hun chhung vek hian Excise and Narcotics department hnathawkte'n heroin kg. 32 leh gram 191 leh methamphetamine kg. 112 leh gram 528 an man baw. Police-te hian Ganja kg. 264 leh gram 66 manin Excise and Narcotics hnathawkten kg. 436 leh gram 88 an man baw a, department pahnih man belhkhawm hi kg. 682 leh gram 154 a ni. Police hian tun thla 7 kalta chhung vek khan crystal meth kg. 35 leh gram 155 an man a, Excise and Narcotics hian nikum lamah crystal meth hi man nual mah se kumin ah chuan man an la nei lova. Police-in kg. 35 chuang an man hi cheng vaibelchhe 105 leh nuai 46 hu niin an sawi a, crystal meth hralhna rate hi a to hle a, a mum a an hralh methamphetamine aiin a let tam takin a to niin an sawi.

Police hotute chuan tun thla 7 kalta chhunga an heroin man hi cheng vaibelchhe 17 leh nuai 14 hu niin , methamphetamine an man hi cheng nuai 29 hu niin an sawi a. Ruihhlo kaihnawih bikah thubuai 236 ziak lutin mi 312 an man a, heroin chungchang bikah thubuai 207 ziaklutin mi 276 an man baw a ni.

Hetih lai hian Excise and Narcotics department-in an chhinchhiah danin kumin January leh July thla tawp inkar chhung khan ruihhlo hmansual avangin mi 44 an thi, thite hi mipa 37 leh hmeichhia 7 an ni a, an vai hian heroin emaw heroin leh damdawi dang khawih kawp emaw vek an ni. Kum 1984 khan Mizoramah heroin khawih mi 1 thi chhinchhiah hmasak ber a ni a, khami atanga kumin July ni 31 thleng khan ruihhlo vanga nun chan hi mi 1,854 an thi tawh a, an zinga 1,628 hi mipa an ni a, hmeichhia 226 an tel baw.

Kum 2004 kha Mizorama ruihhlo vanga thitam ber kum niin mi 143, mipa 122 leh hmeichhia 21 an thi a. Kum 1984-a ruihhlo vanga thi chhinchhiah hmasak ber atanga tun thleng hian kum 1986 chiah kha ruihhlo vanga thi chhinchhiah awm loh kum a la ni.

<><><>

#### WARNING

India Meteorological Department, Ministry of Earth Sciences, Bulletin nimin-a tih chhuahah naktuk Ni 5 atanga Ni 9 chhung hian Mizoram hmun hrang hrangah ruah tam tak sur thei reng a nih thu tarlan a ni.

Hemi chungchangah hian Mizoram District zawng zawnga bawrhsap, Chairman District Disaster Management Authority ni bawkte chuan ruah tam tak sur thei laka mipuite chhijatna thleng thei lakah fimkhur turin hriattirna chhuah a. Mipuite chi-ai lo tura hriattirna leh mi tumahin thu belh chian dawl lo hemi chungchangah hian thehdarh loh turin an ngen a. Amaherawhchu, ruah sur avang hian chhijatna thleng palh thei a nih avangin Village Level Disaster Management Committee te a tul anga lo inring lawk a, harsatna taw. an awm a nih chuan eng tik lai pawhin District Emergency Operation Centre biak pawh theih reng a nih thu an tarlang a ni.

<><><>

## POSTAL DEPARTMENT

Postal Department chuan an hnathawh chu tunlai mamawh milin an thlak ve zel a ni an ti.

State sawrkarin IFMIS an hman angin Core System Integrator hmanga hnathawkin, hemi hmang hian awlsam zawk in hna an thawh theih bakah an hnathawh theihna a tih pun thu Postal department a Marketing Executive Pu HS Lalnghakliana'n a sawi a. Internet hmanga hna an thawh bakah Speed Post hmangin lehkha leh parcel thawn te leh ramdang atanga pawisa inthawn Western Money chu an buaipui hnem pawl a nih thu a sawi a. Pawisa a pung awma dah theihna scheme hrang hrang awmte hmang uar leh zual turin Mizoram mipui a chah a. Post office a pawisa lut a tam chuan state sawrkarin pawisa a puk theih pawh a tam thin tih sawiin, post office-ah sum dah khawlin state tan hna tha tak mitinin an thawk thei a ti a ni.

<><><>

## WAYANAD RESCUE OPS

Thawhlehni kaltaa nasa taka leiminna, Kerala-a Wayanad-ah chhanchhuah leh ruang zawn beihpui thlak zui zel a ni a, leiminah hian mi 300 chuang an thia hriat a ni. Akashvani Kochi Corr sawi danin, leimin atanga a ni 6-na vawiin thleng khan Chaliyar lui mawng lamah mitthi ruang chhar a la ni a, tun thlengin he lui atang hian mihring taksa bung hrang hrang 156 chhar a ni tawh a ni.

State Health Dept. chuan leimin atanga dam khawchhuak naupangte tan counselling ruahmanin counsellor 137-in heng naupangte hi an kawm a, Mundakkai leh Chooralmala-ah clinic an din bawk.

Hetih lai hian Himachal Pradesh-a Shimla, Mandi leh Kullu Dist-a ruah bawhawk sur vanga chin hriat lohva awmte zawn hna pawh ngawrh taka thawh zel a ni a, hriat theih chinah mi 44, chin hriat lohvin an la awm a ni.

<><><>

## US & UK ADVISORY

Israel leh Lebanon hel pawl, Hezbollah inkar boruak sang chho zel vangin United States leh United Kingdom-ten Lebanon-chhuah san vat turin an ram mite an ngen a, Lebanon-a US Embassy sawi danin airlines thenkhat chuan an service ti tawp lailawk rih mahse thlawhna dang thlawk an la awm thova, an ram khua leh tuite chu a rang lama thlawk haw turin a ngen a ni.

Hemi hma lam hian Sweden chuan Beirut-a an embassy chu an lo khar tawh a, an ram mite chu Lebanon chhuahsan vat turin a lo ti tawh a ni.

<><><>